

ঝড়

আহমেদ সাবের

প্রবল বৃষ্টির শব্দে গত রাতে ভেঙ্গে গেছে ঘুম ।
অথবা ঘুমের ঘোরে বর্ষনের শব্দ শুনিয়াছি ।

উথাল পাতাল বৃক্ষ, মাতাল হাওয়ায় ।
বিশাল ঢেউয়ে দোলে আদিগন্ত এলোমেলো ক্ষেত ।
ডাল পড়ে, আম পড়ে, ঢেকে দেয় ভিজা সোঁদা মাটি ।
প্রবল গর্জনে ফুঁসে নদী কালীদহ,
অস্থির ঘূর্ণনে ঘুরে কালো জলরাশি ।
অদুরে প্রচন্ড শব্দে ভেঙ্গে পড়ে গাছ ।
বৃষ্টির শব্দের সাথে মিশে যায় সকরুন আজানের ধ্বনি ।

আমার প্রাচীন গৃহে ঝরিতেছে শ্রাবণের জল,
টিনের বিস্তৃত চালে চলিতেছে বৃষ্টির সঙ্গীত ।
বিধ্বস্ত গাছের ডালে বসে ক্লান্ত পাখী,
হারিয়ে আপন নীড়, খেপা এই দুরন্ত বাতাসে ।

নিবিড় বনের মধ্যে ছুটাছুটি করে,
খেলিতেছে অবহেলে কতিপয় দামাল সন্তান,
নির্ভয়ে । বৃষ্টি ও বাতাস যেন সঙ্গী তাহাদের ।
আমার আদিম বাস্তু ঝড়ে নড়বড় ।
আমিও অস্থির চিত্তে ভাবি বসে বসে,
থেমে যাবে ঝড় এই, কত কাল পর ?

ঘুম ভেঙ্গে চেয়ে দেখি সিডনীর প্রসন্ন আকাশ ।
গাম ট্রির পাতা গুলো ভেজা বৃষ্টি জলে ।
ভোরের নরম রোদ পোহাইছে তাজা, ভেজা ঘাস ।
বাগানে অস্থির কিছু সবাক পথিক -
কাকাতুয়া, মেগপাই, আরো নানা পাখী,
জমিয়ে দারুণ আড্ডা গ্রেভেলিয়া বনে ।